



BARAZA LA WAWAKILISHI – ZANZIBAR

ORODHA YA SHUGHULI ZA LEO

BARAZA LA TISA LA WAWAKILISHI

MKUTANO WA SABA

Kikao cha Kumi na Mbili – Tarehe 12 Oktoba, 2017.

Kikao Kitaanza Saa 3.00 (Tatu) Asubuhi
na Dua itasomwa.

I. TAARIFA YA SPIKA:

II. HATI ZA KUWASILISHA MEZANI:

Ofisi ya Makamu wa Pili wa Rais:

Mswada wa kufuta Sheria ya Uchaguzi Na. 11 ya 1984 na Kutunga Sheria ya Uchaguzi ya Mwaka 2017 na Masuala mengine Yanayohusiana na Nayo

Ofisi ya Rais, Tawala za Mikoa, Serikali za Mitaa na Idara Maalum za SMZ:

Mswada wa Sheria ya Kuanzisha Wakala wa Usajili wa Matukio ya Kijamii Zanzibar na Kuweka Vifungu vya Usajili na Mambo Mengine Yanayohusiana na Hayo.

Wizara ya Biashara, Viwanda na Masoko:

Mswada wa Sheria ya Kuanzisha Wakala wa Maendeleo ya Viwanda Vidogo Vidogo na vya Kati, Zanzibar pamoja na Kuwezesha Ushajiishaji na Uendelezaji wa Viwanda Vidogo Vidogo na vya Kati , Zanzibar na Mambo Mengine Yanayohusiana na Nayo.

Mwanasheria Mkuu wa Serikali:

Mswada wa Marekebisho ya Sheria mbali mbali na kuweka Masharti bora ndani yake na Mambo Mengine Yanayohusiana na Hayo.

III. MASWALI:

Wizara ya Elimu Na Mafunzo ya Amali:

111. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Elimu na Mafunzo ya Amali:

Mhe. Waziri wa Elimu na Mafunzo ya Amali alitamka wakati wa kukabidhi mashine ya fotokopi Skuli ya Donge, kuwa wanafunzi hawapendi kusoma masomo ya sayansi na ndio sababu Zanzibar ikawa na upungufu mkubwa wa walimu ya sayansi.

- (a) Je, Mhe. Waziri, Wizara yako haioni kuwa kwa kauli hii uliyoitoa inazidi kuwavunja moyo hao wanafunzi wachache ambao wangependa kusoma sayansi,
- (b) Je, Wizara haioni kuwa kutofanywa vizuri somo hilo wanafunzi wanapofanya mitihani ndio sababu wanafunzi wengi wanachukia somo hilo.
- (c) Je, Wizara haioni kuwa kutotayarishwa vizuri kwa wanafunzi ndio sababu wanafunzi kutolifanya vizuri somo hilo.

Wizara ya Ardhi, Maji, Nishati na Mazingira:

2. MHESHIMIWA ABDALLA MAULID DIWANI (Jimbo la Jang'ombe) - Atamuuliza Mheshimiwa Waziri wa Ardhi, Maji, Nishati na Mazingira:

Serikali imewataka watu wote wanaoishi mabondeni kuhama pamoja na kuvunja makaazi yao.

- (a) Je, Serikali kupitia Wizara yako imechukua jitihada gani katika kuwapatia viwanja au makaazi bora watu wa mabondeni.
- (b) Ni lini Wizara yako itawaondowa watu hawa sehemu hatarishi kwa njia sahihi.

Wizara ya Kazi, Uwezeshaji, Wazee, Vijana, Wanawake na Watoto:

71. MHESHIMIWA JAKU HASHIM AYOUB (Jimbo la Paje) – Atamuuliza Mheshimiwa Waziri wa Kazi, Uwezeshaji, Wazee, Vijana, Wanawake na Watoto.

Taarifa mbali mbali zimetolewa kuhusu ongezeko la kesi za udhalilishaji kwa mwaka 2017 pamoja na kelele, mipango, mikakati na hatua chungu nzima zilizoahidiwa kuchukuliwa na Wizara kukabiliana na vitendo hivyo.

- (a) Je, kwanini Wizara haisemi kama imeshindwa katika mapambano dhidi ya vitendo vya udhalilishaji.
- (b) Je, kuna mikakati gani zaidi Wizara inakusudia kufanya zaidi ya hiyo iliyokwishaelezwa kabla ya kukabiliana na ongezeko la vitendo hivyo.

133. MHESHIMIWA MWANAIDI KASSIM MUSSA (Nafasi za Wanawake) - Atamuuliza Mheshimiwa Waziri wa Kazi, Uwezeshaji, Wazee, Vijana, Wanawake na Watoto:

Serikali ilikuwa na dhamira njema wakati ilipojenga jengo la kulelea watoto kupitia ZAYADESA nje ya mji na kuwaondosha watoto hao kwenye jengo la zamani (Nyumba ya Watoto Forodhani) lililokuwa Chuo walichosomea wanazuoni wa dini ya Kiislamu Zanzibar na wa nje ya Zanzibar wenye majina makubwa.

- (a) ZAYADESA ni jengo la Serikali au ni jengo linalomilikiwa na Asasi ya kiraia ambayo imechukua jukumu la kuwalea watoto waliochini ya uangalizi wa Serikali.
- (b) Je, jengo hilo la Forodhani sasa hivi linamilikiwa na nani.

26. MHESHIMIWA SAADA RAMADHAN MWENDWA (Nafasi za Wanawake) - Atamuuliza Mheshimiwa Waziri wa Kazi, Uwezeshaji, Wazee, Vijana, Wanawake na Watoto:

Katika miaka ya hivi karibuni kumekuwa na ongezeko kubwa la vitendo vya udhalilishaji wa kijinsia kwa watoto wa kike na kiume ambapo waathirika wakubwa ni watoto wenye umri chini ya miaka 15, hali inayoashiria janga kubwa katika nchi yetu.

- (a) Je Wizara inatoa kauli gani kuhusu tatizo hilo hasa kwa watoto walio chini ya miaka 15.
- (b) Je, Wizara haioni kwamba wakati umefika kwa kushirikiana na Wizara ya Elimu na Mafunzo ya Amali waandae Mtaala Maalumu utakaofundishwa kuanzia elimu ya awali (chekechea) ili watoto na vijana wetu wafahamu na kutambua madhara ya jambo hili.
- (c) Baadhi ya vijana hao pindi wanapokamatwa na kupelekwa magerezani huendelea na tabia mbaya na hata wanaporejeshwa uraiiani, Je, ni hatua gani huchukuliwa na Wizara katika kuwarekebisha vijana hao waliokuwa gerezani.

Wizara ya Biashara, Viwanda na Masoko:

14. MHESHIMIWA MWANAIDI KASSIM MUSSA (Nafasi za Wanawake) - Atamuuliza Mheshimiwa Waziri wa Biashara, Viwanda na Masoko:

Kwa kujua umuhimu wa viwanda vidogo vidogo na kwa kuzingatia umuhimu wa ajira kwa vijana wa kujikwamua na umaskini vijana wengi wamehamasika kujiunga na kujiendeleza katika maisha kwa kujishughulisha na kazi za utengenezaji wa sabuni za Michi (vipande) na wengine kujishughulisha kwenye masuala ya kilimo cha viungo (spice).

- (a) Je, Serikali ina mpango gani wa kuviimarisha viwanda vidogo vidogo ili vijana wengine wapate ajira na kukuza biashara hizo na Serikali kupata pato lake.

- (b) Serikali inachukua hatua gani kuwawezesha vijana hao wajasiriamali kwa kuwapatia nyenzo ili waweze kuendelea na kazi hizo za ujasiriamali.

Wizara ya Habari, Utalii, Utamaduni na Michezo:

91. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Habari, Utalii, Utamaduni na Michezo:

Hivi karibuni kumekuwa na mtindo wa baadhi ya wafanyabiashara hasa za burudani na mawasilano kupita wakitoa matangazo kwa kutumia gari za mizigo midogo (carry) na gari kubwa ambapo hufunga spika kubwa zinazofanya kelele njiani huku maeneo mengine yakiwa na skuli, Hospitali na nyumba za ibada.

- (a) Je, Wizara inachukuwa hatua gani kudhibiti kelele hizo hasa ukizingatia Sheria ya Afya ya Jamii na Mazingira imekataza vitendo hivyo.
- (b) Je, kwa vile kelele ni miongoni mwa mambo yanayohatarisha afya ya jamii, kwanini hatua zinachelewa kuchukuliwa na vitendo hivyo vinaongezeka kila siku

Wizara ya Kilimo, Maliasili, Mifugo na Uvuvi:

73. Mhe. JAKU HASHIM AYOUB (Jimbo la Paje) - Atamuuliza Mheshimiwa Waziri wa Kilimo, Maliasili, Mifugo na Uvuvi.

Hivi karibuni kumeripotiwa upotevu mkubwa wa mapato ya mchanga ambapo gari 49 zimeripotiwa kukamatwa zikihusika na upotevu huo.

- (a) Je, ni kiasi gani cha mapato yaliyopotea kuhusiana na kadhia hiyo.
- (b) Je, mapato hayo yamepoteaje wakati watendaji wa Wizara ya Kilimo ndiyo wanaokusanya na kupeleka Benki ya Watu wa Zanzibar.

108 MHESHIMIWA OMAR SEIF ABEID (Jimbo la Konde) - Atamuuliza Mheshimiwa Waziri wa Kilimo, Maliasili, Mifugo na Uvuvi:

Kumekuwa na malalamiko kuhusu utaratibu wa ukodishaji wa mashamba ya karafuu ambapo wananchi wenye mashamba yasiyo na waraka uliotolewa na Marehemu Mzee Abeid Amani Karume kunyang'anywa na kukodishwa mtu mwengine na hivyo kuwakosesha haki ya kutumia mashamba hayo wake na watoto wa waliokuwa wamiliki wa mashamba hayo.

- (a) Je, ni sababu gani inayosababisha kwamba kuyakodisha mashamba hayo wake au watoto wa marehemu ambao walipewa shamba hizo hapo mwanzo.
- (b) Ni lini hasa Serikali itawakabidhi wananchi mashamba hayo ili wayapande mikarafuu kwa maslahi yao na kuweza kuongeza uzalishaji wa karafuu.
- (c) Je, baada ya kukodisha kila shamba, Serikali hutenga asilimia ngapi ya fedha kwa ajili ya kuhudumia shamba.

130 MHESHIMIWA HIDAYA ALI MAKAME (Nafasi za Wanawake) - Atamuuliza Mheshimiwa Waziri wa Kilimo, Maliasili, Mifugo na Uvuvi:

Wakulima wa mazao ya mboga mboga walioko katika maeneo ya Kizimbani, Bumbwisudi, Mkanyageni, Miwani na kwengineko wangepaidika zaidi endapo huduma za ununuaji na uuzwaji wa mbegu, mbolea, dawa na maelekezo mengine ya ukulima bora wangepapata kutoka pale chuoni kwa kupitia wahudumu wake kuliko kutoka sehemu nyengine za maduka ya vichochoroni.

- (a) Je, Wizara inafahamu kwamba kupatikana kwa huduma hizo za uuzwaji wa mbegu, madawa na mbolea katika sehemu ya chuo kutaleta unafuu zaidi kwa wakulima kujua kuvitumia vitu hivyo kwa umakini zaidi.
- (b) Wizara ya Kilimo kwa kushirikiana na Wizara ya Afya haioni kwamba kutumia njia hiyo ingeweza pia kupunguza madhara na maradhi yanayosababishwa

na wakulima hao kupitia mboga mboga na mazao mengine kuwekwa kemikali na kusababisha maradhi yakiwemo presha na sukari.

- (c) Ni hatua gani za ziada zitachukuliwa na Wizara kuweza kuwaelimisha wakulima na wananchi kwa ujumla kuweza kujua kuzitumia na kuzifanyia kazi dawa ambazo zinatumiwa kuulia wadudu na kuimarisha mazao na mboga mboga ili zitumiwe na zisiwaathiri watumiaji na vyakula hivyo.

Wizara ya Afya:

64. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Afya:

Mnamo tarehe 20/7/2017, vyombo vya habari mbali mbali, likiwemo Shirika la Utangazaji Zanzibar (ZBC) vimeripoti kuwa maradhi ya Kichocho kisiwani Pemba yapo juu,

- (a) Ni sababu gani zimepelekea maradhi hayo yenye athari mbaya kwa jamii kuongezeka kwa kasi kisiwani Pemba.
- (b) Ni lini zoezi la ugawaji dawa kisiwani Pemba litafanyika ili kudhibiti kasi ya ongezeko la maradhi hayo.

89. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Afya:

Kwa muda mrefu sasa karibu miezi mitatu "lift" ya Hospitali ya Mnazi mmoja imekuwa haifanyikazi na kusababisha usumbufu kwa wagonjwa wanaohitaji kupandishwa juu. Hali hiyo pia inawasumbua jamaa wa wagonjwa ambao wanalazimika kumbeba mgonjwa kwenda naye juu kwa kutumia ngazi.

- (a) Je, ni kwanini "lifti" hiyo kwa muda mrefu imeachwa bila ya kutengenezwa
- (b) Je, gharama kiasi gani zinahitajika kuifanyia matengenezo "lift" hiyo na kwanini Serikali haitafuti fedha hizo haraka ili "lift" hiyo ikatengenezwa.

90. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Afya:

Pamoja na kuwekwa mfumo mpya wa mashine ya kuchomea taka katika Hospitali ya Mnazimmoja bado imeonekana kutofanyakazi kwa ufanisi kwa vile taka ngumu haziwezi kuchomwa vizuri na badala yake Baraza la Manispaa linatumia watendaji wake kuziondoa taka hizo.

- (a) Je, lini mfumo wa uchomaji taka wa mashine hiyo utarekebishwa ili ukidhi mahitaji ya Hospitali ya Mnazimmoja
- (b) Je, Wizara haioni kuwa kitendo cha kuwatumia Baraza la Manispaa kuondoa baadhi ya taka za Hospitali ya Mnazimmoja kitasababisha hatari ya kueneza maradhi kutokana na maumbile ya taka za Hospitali.

Wizara ya Ujenzi, Mawasiliano na Usafirishaji:

121. MHESHIMIWA MACHANO OTHMAN SAID (Jimbo la Mfenesini) - Atamuuliza Mheshimiwa Waziri wa Ujenzi, Mawasiliano na Usafirishaji:

Katika miaka ya 2005-2010 wakati Shirika la Ndege la Tanzania (ATC) lilipoyumba kiuchumi hadi kuchukuliwa na Shirika la Ndege la Afrika ya Kusini (SAA), Shirika hilo la ATC liliacha deni kubwa kwa Serikali ya Mapinduzi ya Zanzibar.

- (a) Kwa kuwa hivi sasa ATC imeimarika kibiashara Je, Serikali imejipanga vipi kudai deni hilo.
- (b) Ni kiasi gani cha deni hilo ambalo lipo na linatambuliwa rasmi.
- (c) Je, katika bodi ya Wakurugenzi ya ATC, yupo mjumbe yeyote kutoka Zanzibar.

128 MHESHIMIWA HIDAYA ALI MAKAME (Nafasi za Wanawake) - Atamuuliza Mheshimiwa Waziri wa Ujenzi, Mawasiliano na Usafirishaji:

Kwa kuwa mvua zilizonyesha hivi karibuni katika msimu wa masika zimepelekea baadhi ya barabara nyingi za hapa nchini kuharibika vibaya na nyengine kutopitika kabisa, pamoja na hali hiyo Serikali ya Mapinduzi Zanzibar imefanya juhudi mbali mbali za kuzikarabati baadhi ya barabara hizo na napenda kuchukua fursa hii kuipongeza Serikali kwa hatua hiyo. Hata hivyo, baadhi ya barabara bado zina matatizo makubwa ya mashimo ikiwemo barabara inayotokea Unguja Ukuu Kiembeni hadi Uzi Ng'ambwa ambapo barabara hii ina matatizo makubwa kwa hivi sasa na wananchi wa maeneo hayo hufanya juhudi za kufanya ukarabati kwa nguvu zao wenyewe.

- (a) Je, Wizara imechukua hatua gani za kumaliza pale wananchi waliposhindwa kumaliza kwa kuweka angalau zege katika eneo hilo.
- (b) Kuna utaratibu gani wa Wizara kuimarisha miundombinu ya barabara katika vijiji ambavyo vina mazingira ya vivuko kikiwemo kijiji cha Uzi na kwengineko.

III. HOJA ZA SERIKALI:

Ofisi ya Makamu wa Pili wa Rais:

Mswada wa Kufuta Sheria ya Uchaguzi Na. 11 ya 1984 na Kutunga Sheria ya Uchaguzi ya Mwaka 2017 na Masuala mengine Yanayohusiana na Nayo - Kusomwa kwa Mara ya Kwanza.

Ofisi ya Rais, Tawala za Mikoa, Serikali za Mitaa na Idara Maalum za SMZ:

Mswada wa Sheria ya Kuanzisha Wakala wa Usajili wa Matukio ya Kijamii Zanzibar na Kuweka Vifungu vya Usajili na Mambo Mengine Yanayohusiana na Hayo – Kusomwa kwa Mara ya Kwanza.

Wizara ya Biashara, Viwanda na Masoko:

Mswada wa Sheria ya Kuanzisha Wakala wa Maendeleo ya Viwanda Vidogo Vidogo na vya Kati, Zanzibar pamoja na Kuwezesha Ushajiishaji na Uendelezaji wa Viwanda Vidogo Vidogo na vya Kati , Zanzibar na Mambo Mengine Yanayohusiana na Nayo - Kusomwa kwa Mara ya Kwanza.

Mwanasheria Mkuu wa Serikali:

Mswada wa Marekebisho ya Sheria mbali mbali na kuweka Masharti bora ndani yake na Mambo Mengine Yanayohusiana na Hayo – Kusomwa kwa Mara Kwanza.

Zanzibar,
12 Oktoba, 2017.

(Amour M. Amour)
KNY. KATIBU WA BARAZA.